

Es iss kompliziert
von Wolfgang Arnold

Es Lääwwe is kompliziert worn! Woahnsinn! Frieher war äijendwie alles oafacher! Es hod hoald ned so veel gääwwe - do ist die Wahl nedd sou schwer gfalle. Äwwer heid! Bei allem muss me iwwerläije unn e Entscheidung treffe. Des koann oam goanz schäi uff de Senkel gäh.

Des fengd moiends im Bad ou! Frieher hodds oa Tub Zoupaschda gääwwe – fädisch! Heid gibdds oani fer moiends, oani fer middoags, oani fer owends, oani fer vorm Esse, oani fer dennooch un oani fer zwischedoisch! Es gibbd sogar Zoupaschda fer leid, die gar koa Zäih mäih häwwe! Wer soll sich doann do noch auskenne?

Doann gäischd de moiend zum Bäcker, wäijem Friehschdick! Woas war des frieher fer e oafachi Sach! Do hoschde en beläigde Weck unn en Kaffee beschdelld – un der orre die hinner de Loarrethek hodd gewissd, woas du willschd!

Un heid? Des fengd beim Kaffe ou: „Wolle sie: Milschkaffee, en Ladde, en Mokka, Karamell, mid Koeffin, mid wenisch Koffein, goanz ohne Koffein? Grouß, middel, normal, kloa?“

Isch will en Kaffee! Ehr derf ruhisch normal soi! Vielleisch mid e bissel Milsch drin! Dess muss doch meglisch soi – „Einmal Milchkaffee, normal. Danke!“, säigd die Frau hinner de Thek!

Des is groad sou gut goange! Jetzt kimmd äwwer de Weck!

En Weck! Des is sou woas helles, zum Uffschneide! Midd weißem Teig drin, vunn dem me schun emol schäh woas raurpuule koann, bevor me sich den Weck schmeerd! Der hodd sou en Schlidz in de Medd! Frieher hodds als Varioande häichchdens noch runde Kaiserweck gääwwe! Midd souehre Kron owwe druff. Uni oan Feierdoag vielleischd emol en Mohnweck!

Un heid: Kernerweck, Kürbiskern, Sunneblumekern, Mehrkorn,
Vollkorn, Sesoam, Dinkel, Rogge, Lauge - hell dunkel, grouß, kloa....

Woas sollen des? Isch will en Weck! Vun denne helle – ohne Kerner.
Alles oannere is koan Weck! Dess will isch ned!

Doann bischde frieher normalerweis häichschdens noch gfroogd
worn, obbde Worschd orre Kees druff hou willschd.

Un Heid waschde ned oi noch aus, vor laurre Puudebruschd, derrem
Schinke, Camerbert, Ziegenkäse, Edamer... bio, feddarm, leischd...
Salami? Salami gibbds - äwwer blouß uff Kernerweck! Doann nedd!
Un isch will a koa Paprika orre Ei, orre schunschd woas. E Gummer!
Frieher hods uff alles druff e Gummer gäwwe! Dess war guud – do
hehd me nix drou ännern misse!

Machd e bissel Budder unn e Scheib Worschd druff unn den Weck!
Bitte! „Gsoalzeni Budder orre ohne Salz? Normal orre fettarm?“
Budder!!! Wiese moi Modder als dehoam kadde hodd. Die is oafach
uffs Brot druffkumme – ohne bleed zu fräje!

Inzwische is moin Milschkaffe nimäi normal, sondern koald!

Isch trau misch schunn gar nimäi zu frooche, oab isch noch enn
Läwwerkeesweck fer middoags hou kann! Isch sah den Kroam jo
schunn in de „haaße Thek“ laije: middd un ohne Zwiwwel,
Pizzaflaaschkees, mit orre ohne Paprika, Fleischkees ohne Fleisch,
Keesefleisch ohne Kees. Läwwerkees ohne Worschd...

Isch will blouß noch bezoahle un gäih! „Bar oder mit Karte? Sammeln
sie Treuepunkte?“ Himmelherrgodd! Kloageld wärnse wohl noch
nemme, orre?

Frieher bischde de owends hoamkumme un hoschd die Glodz
ougemoachd. Do is ARD und ZDF kumme – un woann de Glick kadde
hoschd noch e drittes Progroamm! Do hoschde blou zwaamol
umschalde misse, um zu wisse, dass heid blouß Scheißdreck leefd.
Dess war e Sach vunn fünf Minudde unn du hoschd woas oanneres

make kenne.

Heid musschde disch doisch 200 Progroamme doischschalde, bissde zu dem gleische Ergebnis kimmschd. In dere Zeid, die de dodefer brauche duschde, heschde en Haufe oannern Sache make kenne!

Alles is veel zu komplizier worn!

Woann friher de Toank vum Auto leer war, doann bischde oan die Toankschdell gfahrn un hoschd getoankt. Basta! Alles woas de wisse hoschd misse war, ob de en Benziner orre en Diesel fährschd! Heid gibds Super, Super plus, E 10, Biosprit. Mit Blasen orre ohne... Des machd koann Schbass mäih!

Woann de doann bezoahle willschd: „Woas fer e Zapfsäule häwwwe sie kadde?“ – Die gääl do vorne! - „Die sin alle gääl!“ – Sehn se! – „Isch brauch äwwer die Nummer vun dere Zapfsäule!“ – Die waas isch nedd. Es war di do, goanz vorne – „Die drei!?“ Woann Sie des soache...

Dess wird mehr alles zu bleed! Isch gäih jedz in die Kneipp, e Weize trinke un oabschalde!

Weize? Kristall, Hefe, hell, dunkel, grouß, kloa, aus de Flasch orre vumm Fass.....